

嘉興府志卷二十九

嘉興府知府 伊湯安 重輯



水利

禾爲澤國民食水之利溥矣顧有利卽有害將祛害以收利非善因不可因水之性因地之勢因時之變通因不一也惟其宜而已唐宋來講求水利者不乏人如郊廩之六得六失辯矣而時議猶謂其措置乖方無他未善因耳故茲所叙特舉其善因者俾後之人得所循焉

志水利

案嘉郡水道源於武林漢書地理志武林山水豬爲西湖湖水北流出是也浙江通志云武林諸山水豬爲西湖湖水北流

嘉興府志

卷二十九

水利

一

合外沙河東過未昌壩合菜市門河西至會安壩合良山門河轉德勝橋武林門內大河自吳山水驛過清湖上中下三閘與之會分爲二一爲上塘河東過臨平山北至長安壩一爲下塘河過北新橋北流爲運河歷謝村塘棲穿石門城左受語兒桐樹十八涇右受柿林羔羊十三涇之水逕石門塘東折彎環如帶曰玉灣也入桐鄉界南受車口陸墅北受車溪爛溪龍翔灣諸水東流逕阜林入秀水境途白龍潭東流瀘爲鴛鴦湖一名南湖其東南爲滬湖一名馬腸湖長水海鹽二塘水之所匯也長水塘自長安壩東流爲二十五里塘河過海寧縣又東流入袁花塘妙果山之尾合姚塘茶湖麻涇彭墩泮江塘諸水入洛塘河北經紫微山贊山間爲硤石河東經練浦海鹽塘亦合海寧諸水北經橫塘俱匯於滬湖東流經雙溪橋又東出會龍橋分二支一由漢塘至平湖一由魏塘至嘉善其由滬湖入澄海門由漕河入通越門者出望吳春波二門俱東趨會龍橋又一支遶城北流過西麗北麗爲相家湖又東北爲麟溪亦入嘉善境其由漢塘東流者合胥江陶涇諸水匯爲當湖海鹽鷺鷥上谷黃道諸湖之水合流而北過柳莊獨山乍浦諸塘之水入之東北流由三邵入黃浦自魏塘



東流者一為華亭塘東為張涇匯為風涇之白牛塘合祥符蕩葉蕩之水會章練塘東入邗一為冬瓜湖塘北流入夏墓蕩又北入汾湖又北入澱山湖東至黃浦入海其天目派白湖州來者入運河東流為官塘河經昇山塘合烏鎮水入新城塘過石白漾合穆溪水入嘉興之漕河此嘉郡水道之源委也

歷代開濬大畧

宋元嘉二十二年揚州刺史始興王濬以松江滬瀆壅噎

不利欲從武康紵溪直出海口穿渠滄功竟不立嘉興湯志

案嘉善縣志云宋元嘉中西從武康苧溪導水東至黃浦即今華亭塘其說未知何據姑存之

嘉興縣運河在縣西南通崇德縣北接吳江界隋大業六年勅開江南河自京口至餘杭八百里面濶一十餘丈擬通龍舟白樂天詩云平河七百里沃壤兩三州謂此

嘉興府志

卷二十九

水利

二

水也

至元志案析縣後運河屬石門桐鄉秀水三縣境

唐元和五年王仲舒治蘇堤松江為路即今石塘嘉興湯志

吳越天寶八年置都水營田使募卒為撩淺軍亦謂之撩

清於太湖旁置撩清卒四部凡七八千人治湖築堤一

路入吳淞江一路自急水港下澱山湖入海居民遇旱

則運水種田澇則引水出田十國春秋

宋乾興元年詔蘇湖秀州積水害稼其發隣郡兵疏導壅

闕仍令發運使董之遣尙書職方員外郎楊及往蘇湖

秀州催督

嘉祐五年轉運使王純臣建議請令蘇湖常秀修作田塍



位位相接以禦風濤令縣官教誘殖利之戶自作塍岸  
定其勸課爲殿最當時推行之

以上嘉興湯志

中書檢正沈括言浙西涇浜淺涸當濬浙東隄防川瀆堙  
沒當修請下司農貸緡募役從之仍命括相度兩浙水  
利

元符三年二月詔蘇湖秀州凡開治運河港浦溝瀆堤岸  
開置斗門水堰等許役開江兵卒

崇寧元年十二月置提舉淮浙澳牘司官一員凡常潤杭  
秀揚州新舊等牘通治之

政和元年十月詔蘇湖秀三州治水勅立圩岸其工費許

嘉興府志

卷二十九

水利

三

給越州鑑湖租賦

六年詔令守臣莊徽等講究水利於是發運副使應安道  
言凡港浦非要切者皆可徐議惟當先開崑山縣界茜  
涇塘等六所秀之華亭縣欲並循古法盡去諸堰各置  
小斗門

淳熙十一年冬臣僚言運河之浚自北關至秀水杉青各  
有牘堰自可蓄水惟沿河下岸涇港極多其水入長水  
塘海鹽塘華亭塘由六里堰下私港散漫悉入江湖以  
私港深運河淺也若修固運河下岸一帶涇港自無走  
泄又自秀州杉青至平江府盤門在太湖之際與河水



相連皆不必浚以上宋史河渠志

嘉泰二年六月壬午浚浙西運河宋史寧宗本絕

澈浦鎮西六里有永安湖者瀦諸山之水以灌三村十六  
保之田周十有二里莫詳陂築所自宋志云舊本是田  
為畝三千七百後隄之為湖灌田八千三百餘而均稅  
於田故稅額雖重卒無旱乾患元時為蒙有力者決壞  
民以失業有寓公王濟始奏復之洪武初鎮民張小五  
請於朝嘗遣官開濬至正統十年縣丞龔潮復請旨重  
濬竟以工大倚閣稍患淤淺矣湖舊深一丈五尺置牖  
引灌具有法雨久水多則東南洩於海所灌田產穀甚

嘉興府志

卷二十九 水利

四

美租亦倍入為海邑腴產海鹽圖經元大德十三年

德政鄉十三都澈浦澈墅石帆村住坐社長張千五等  
今蒙本都里正奉海鹽州指揮該為照勘本都永安湖  
有無違碍公事今來千五等從實照勘責說得本里古  
有永安湖三千七百畝積諸山之水灌既澈浦澈墅石  
帆三村官民田八千三百餘畝此湖原係民田為湖其  
稅均於湖側田土輸納就湖東際石砌斗門水板為閘  
以時啟閉每遇天旱閉閘放水下流灌救田苗或天雨  
連綿湖水漲溢卻有東南葛母山下古置渾水閘放泄  
入海是以三村農田稅雖繁重歲無水旱之憂百姓均  
受其利見存亡宋武原誌書詳載分曉至元十三年歸  
附初鎮守管軍官王招討分付駱百戶監督隅保塘長  
起差鄉夫將永安湖西南際湖面築捺圍裏成田三百  
八十畝於官司投告文憑虛指湖面卻作天荒碎草地  
段即非有主民產亦非係官地土自此作駱興名字抱  
佃送納官糧三十石於後至元二十六年有王招討  
男王四萬戶將上項湖田過佃澈浦鎮楊招討召業之  
後卻於湖田南際掘開海塘剏造石閘連年每遇春水  
泛漲之時不顧此湖積蓄救田水澤以備天旱但恐淹



損湖田菜麥卻將湖水黃夜放泄入海及至夏旱要得  
湖水灌田又被管佃戶朱六十二壩塞不容水源通流  
致有三年兩旱田禾不收百姓賠納官糧并老小口食  
不給典妻賣子流離死亡為是豪勢畏懼不敢言告民  
受其害冤抑不能上聞若蒙官司將上項湖田仍舊開  
掘為湖積水灌田實為民便今蒙體問所責是實伏乞  
詳情脩申年月日縣押司吏余志遠押復永安湖碑  
記國以民食為天而民食又以瀦水為先務最重也皇  
元撫育人民與舉水利無遺亦盛矣哉海鹽本嘉興屬  
邑比陞為州州南四十五里有湖曰永安周迴十二里  
瀦水灌溉澉墅澉浦石帆三邨農田潦則東南注入於  
海旱則水澤仰給於湖遂變斥鹵為膏腴時和歲豐家  
給人足茲有禩矣歸附初至元丁丑澉浦鎮守王招討  
熔假軍權而滔毒縱已欲以誅求力逼鄉夫圍湖成田  
三頃八十畝令駱興立戶每秋輸糧三十八石至元已  
丑歸之楊招討恩諒未幾瀨湖居民効尤盡欲決而田  
之是以三邨屢經旱患民食不給多流徙四方者大德  
已亥里人王仁狀具於州雖鞫治焉猶未削誅也幸賴  
澉浦寓居宣威將軍前南寧州安撫使王君濟勇於為  
義聞之朝廷由是省臺委官公同蒞政目擊斯害昭然

嘉興府志

卷二十九

水利

五

孔彰大德乙巳秋七月浙江行省平章政事徹里榮祿  
借都水監官及本路本州官親臨糾惡廉明公正遽令  
疏濬為湖開除元立佃米一改而正之於是狼吞虎噬  
之徒為之斂跡斯湖得以復舊噫不有廢也成之名不  
彰不有壞也立之功不著今廢而復立使斯民享悠久  
無窮之利得遂仰事俯育之願顧不偉歟茲刻於石庶  
來者知斯湖源流有自云爾至大四年辛亥二月日前  
權東坡書院山長趙若源撰從事鮑郎場鹽司令金汝  
礪書承務郎嘉興路同知海鹽州事趙泰篆奉政大夫  
嘉興路兼勸農事朱緒立石 天順三年海鹽縣委官  
主簿樊公佐佑勘湖工申文略云勘得本湖通行三千  
七百四十二畝中有官塘行路一條古分南北二湖二  
湖周圍俱係山海北湖口原有古閘一座樽節水利遇  
旱起開放水閘下四散河港車蔭官民屯田八千三百  
餘畝本湖并河港自洪武年間有老民張小五奏淮起  
夫開挑各深五尺三時不早田禾有收到今八十餘年  
其湖河港浜瀆俱淤塞淺窄徧生野草遇旱俱如平地  
湖底與田彷彿高低無水車戽似此荒多熟少連前虧  
欠稅糧民食不給流移逃竄後於正統十年得蒙本縣  
縣丞龔潮達奏奉工部堂字三百七十一號勘合行仰



委官踏勘起倩七縣人夫一萬八千五百餘名開挑至今未蒙起夫興工田不愈加荒旱今蒙勘得本湖南北二處俱各平淺開下通湖河港高如湖底如蒙查照原奏勘合事理起夫將開下河港浜濃急當先濬通接六里堰下河港接開北湖開掘之際倘有雨水不常先將開下河浜瀝去水漿庶不失候工程以後方開南湖若得開完河湖田禾有收糧無拖欠人民利益逃者思歸又畝浦千戶所軍餘屯田俱得利便今勘得永安二湖古該三千七百餘畝今量計三千七百四十三畝南湖一千三百三十三畝每畝用夫五名共夫六千七百六十五名開深五尺北湖二千四百一十畝每畝用夫五名共夫一萬二千五百名開深五尺閘下河港浜濃量計五千九百七十九丈五尺濶狹不等每丈用夫一名共該夫五千九百七十九名開深五尺俱計工二箇月

完可  
國朝嘉慶三年十二月知縣任澤和議濬永安湖修築堤閘

次年正月大雨水滿湖未果濬凡修築湖閘四座  
新纂知

嘉興府志

卷二十九 水利

六

縣任澤和稟勘得畝浦迤西環山負海中有屯田民產八千四百餘畝向賴永安湖灌溉且有堤閘以時蓄洩自乾隆三十六年挑濬以來湖身日就淤塞若再因循勢必漸成平陸中湖塘長五百餘丈茅塘長六百餘丈係經由海寧大路亦俱坍塌低陷不特天晴無以瀦蓄農民盡力無由若遇大雨堤沒水中即行旅亦有病涉之苦該處湖堤允宜急為濬築知府伊湯安批據稟稱濬築永安湖堤閘俾畝浦一帶屯田民產均資利益殊堪嘉尚仰即飭令首事乘此農隙之時亟為經理并禁書差地保不得于預滋弊

元泰定元年江浙行省以平松江通海河道壅塞軍民

官勢侵占水面為田遞年水旱相仍官民虧失大利委

官同本處正官踏視講議到吳江舊江二道烏泥涇大

盈浦二河合挑緣癸巳歲禁止動土請工部論報云上

項河道江浙省已嘗講議修則官無虧糧民可足食難



與其餘土木之工一體停罷奏命行省左丞朶兒只班知水利前都水少監任仁發董督常州湖州嘉興平江與本府不分是何人戶實有納苗田一頃五十畝差夫一名計四萬有奇每名日支口糧三升中統鈔一兩賜仁發銀一錠襖子三領始于是年冬十二月次年正月訖功仍令講究久遠不致淤塞良法

嘉興湯志

洪武六年二月發松江嘉興民夫二萬開上海縣胡家港自海口至漕涇一千二百餘丈濶二十丈以通海船及

濬海鹽縣漵浦河

明史河渠志

永樂元年四月命戶部尙書夏原吉往浙江諸郡治水時

嘉興府志

卷二十九

水利

七

嘉興蘇松諸郡頻年水患屢勅有司督治迄無成功故

有是命

嘉興湯志

永樂元年六月上以久雨謂戶部侍郎古朴曰蘇松嘉湖

四郡水必泛溢宜速遣人視之遂命侍郎李文郁往佐

夏原吉相度水田量免今年租稅

以上嘉興湯志

永樂二年夏原吉復奉命治水疏通舊河港

永樂五年修長洲吳江崑山華亭錢塘仁和嘉興堤岸九

年修長洲至嘉興石土塘橋路七十餘里洩水洞百三

十一處

宣德五年巡撫侍郎成均言海鹽去海二里石嵌土岸二



千四百餘丈水齧其石皆已剝敝議築新石於岸內而存其舊者以爲外障乞如洪武中令嘉嚴紹三府協夫舉工從之

以上明史河渠志

宣德五年周尙書忱巡撫江南檄築塘岸通漕運自南津

至塘棲達杭州橋道未接者開路設橋以濟不通

崇德新志

正統八年疏海鹽永安湖茶市院新涇陶涇塘諸河

志

明史河渠

景泰八年知縣郁綸濬運河涇淺時運河自石門至大漠

多涇淺綸率衆縱橫繩度濬深四十里許

崇德新志

宏治七年七月命侍郎徐貫與都御史何鑑經理浙西水

嘉興府志

卷二十九

水利

八

利明年四月告成又令浙江參政周季麟修嘉興舊堤

三十餘里易之以石

明史河渠志

郡圍田河涇縱橫爲古井畫之遺莫可詳矣至唐廣德中

屯田使朱自勉濬畝距溝濬溝距川後刺史于頔繕堤

防疏鑿畝滄列樹表道傳記始載其制時郡爲嘉興海

鹽二縣嘉興地勢平行旱澇易備海鹽面海並山南高

北傾農時十日不雨田者無措故開堰爲急令海鹽者

唐長慶中有李諤開古涇三百有一創長豐開二宋咸

平中魯宗道導藍田浦白塔港水一十八里嘉祐中李

惟幾濬溝洫樹木開置鄉底堰三十紹熙間李直養修



鄉底堰八十餘及常豐二閘築支港堰二十四後趙善  
悉濬烏邱招寶等塘築堰八十一海鹽堰閘之功世見  
紀載如此而嘉興境多濱湖水田原阜纔十之二省修  
築矣其圍田五代錢氏嘗置營田軍四部八百人專力  
田事宋罷營田軍端平中轉運使喬惟岳復鑿所逕隄  
堰便漕而富民取盈田租輒不修圩又其俗以一易再  
易田爲白塗田穫倍常而租如故佃民利淹沒遂鑿古  
堤捕魚墾之樹藝或傍圩敗圯波及於是田圍盡廢每  
春夏霖雨田輒瀰漫乾興元年詔發運使董諸郡兵疏  
導壅闕嘉祐三年轉運使王純臣上言詔縣令民作田

塍位位相接因此爲縣官殿最四年詔置開江兵立吳  
江等四指揮興修熙寧條例司雍元直偏治浙西河渠  
頒約束朝議諄諄田事然競持短長或民習苟便用輒  
不竟崑山郊亶亶子僑宜興單諤戶曹趙霖爲書最悉  
事連全吳今不具載自是蘇湖秀治田修堤乃許役開  
江兵原隰悉治南渡後多僑寓巨家聯土著至涸湖蕩  
爲田而兵卒輒復築濱湖隄爲壩田自利遇旱灌溉壩  
田足乃得他及澇則壩圩屹屹周遭港口輒不易泄民  
患苦之淳熙間諫議史才請約束之乃得盡去壩田及  
涸湖田後廷臣議復田裕邊卑鄉復病元大德間立浙



西都監營田司定諸湖界禁民不得占然當事者多北人不習水利田益壞語在任都水答議中至正中建都水庸田使司詔尙書禿魯平章只里瓦歹選知水人集議典役吳人陸行直希平章旨言歲在浙不利然朝議竟肇工而卒主導河圩岸開竇俱敗決不治澇則不流反浚湖水奔駛田中其害滋甚明洪武永樂間數遣重臣董治夏忠宣公原吉鑿界浦鑿范家浜入海蹟在鄰郡其巡視上流嘗立石準于西塘鎮福源宮前督民飭田圩樹藝民懷思之曰憂懼石

嘉善善章志案樹石測水宋舊制也石長七尺有

嘉興府志

卷二十九

水利

十

則下中田滄過五則上中田滄過六則稍高田滄過七則極高田滄如水至於其則某鄉之田被災不待各鄉報到亦不待官府勘視已預知於日報水則之中矣今縣田高下分爲五則具在各區圖內則測水之石亦宜列爲五則移至本縣東門外擇人司之每旬以水之漲落報縣最爲良法

通政趙居任濬河

渠又自崇德北抵吳江植榆固堤周文襄公忱築運隄剡橋通道皆顯有功德于郡其他諸大僚治水以殺全吳水勢爲急然蘇禾雖皆澤國而禾實上游蘇爲委尾以故每興人徒浚青龍白茅安亭白蜆諸港令委尾深闊直走諸郡淫潦以入于海使不爲全吳害乃其得策顧末流尙盈而上游已涸禾地之高仰而閘堰不治者輒困旱災如平湖境及嘉善北鄉崇德千乘蕪土乃彌



望焉于是知嘉善劉克及郎中傅潮修圍岸創果字等

圩鑿便民河二萬七千尺溉田萬餘畝云華亭錢福記

大府其屬縣嘉善最為膏腴平壤宏治十二年新喻傅

公曰會以正郎詹特簡來守視地圖所廢興而承之者

弗力公竊慨焉又一年安福劉君克溫以進士來令公

遂謀之劉君及丞朱君暎乃遍歷原隰相視便宜於是

因舊而修為圍岸以丈計者三十六萬二千有奇為驛

路官塘以丈計者六千五百有奇創始而築者果字圩

岸塍以丈計者三千六百有奇凡護田若干畝此其為

防之功也創開便民河者十以丈計者凡二千七百有

奇淺澀艱阻疏而通之為市河者三以丈計者一千四

百有奇掘淤鑿塞為支涇曲港者八以丈計者八百九

十有奇瀦洩灌溉以利田者若干畝其便往來者不可

勝計此其為浚之功也或修或創為橋梁者十經始于

宏治庚申正月望日嘉善丞倪璣築思賢奉賢下係諸

詎工于辛酉十月朔邵康僖公銳水利記畧浙以西稱健

圩瀦陂湖瀦溝洫吏曰倪嘉善嘉善如至問官問百姓

疾苦首曰水利乃躬出按視縣治以南地勢高亢不有  
所蓄吾民其病旱乎逾北水所輸委不有所洩吾民其  
病澇乎於是計地程工計工程力計力程費召厥父老  
指授方略大都以澇為尤急也首瀦淤河及所支曲俾  
罔壅滯自思賢鄉至奉賢鄉二十八所以丈計者三千  
八百六十有奇又築圩岸益卑削為高堅自三千三百  
至四十都三百八十二所以丈計者一萬五千二百若  
圩之尤下者仍築圩岸其中俾有分守自下係東區至  
奉九八區亦一十五所以丈計者六千四百九十高亢  
之地並加疏闊又瀦為陂塘散為溝洫具有脈絡自永  
七都至胥五都總二十九所又總計為三百五十五丈肇  
自正德十年十一月至十一年十二月厥功告成使瘠  
鹵化為膏腴居者載寧逋者胥復而歌頌于是乎作矣  
侯名璣陝西咸寧人倪璣水利議畧案水利之說周  
鼎論之頗詳謂高鄉溝洫為急而圩岸次之低鄉圩岸  
為急而溝洫次之斯則審密之論嘉善自縣治以南皆  
高亢乏水連月不雨則苗向槁雖遇有年其收亦薄非  
地力有異田素渴水而瘠民積貧無以糞其田故也必  
令土人多瀦溝洫蓄水待灌溝中之土令下鄉人遇圩  
岸坍塌時往載增築則上有所歸而高下漸趨於平旱



澇皆利矣否則胥山等區不久當鞠為茂草豈獨洪波巨浸能使民墊溺哉 崇德令洪異創

天長十字河千乘蕪土化為膏腴者三千畝 崇德新志正德十一

年知縣洪異開天長河在千乘鄉原有荒土一區古吳越屯兵之所俗稱天長路旱澇積荒稅累一縣賠納異

詢得之開為十字河通沙木等涇東西七八里南北五六里廣五丈餘灌田四千餘畝三年成就起科補納荒

糧民感其惠 分守何宜知縣譚秀相繼濬陶涇等河稍稱為洪河

置堰開 海鹽圖經陶涇塘縣北一里自北關外北流至平湖縣界一十二里宋淳熙九年守臣趙善悉

重濬成化六年參政何宜宏治元年在平湖獨鮮治者以年僉事伍性知縣譚秀復濬之

故頻有旱災民多轉徙矣司民命者誠相地為制治堰

開慎節宣庶幾有備無患 趙圖

嘉靖二十六年知府趙瀛濬治運河築語兒上塘 浙江通志 趙

嘉興府志 卷二十九 水利 十三

文華修運河塘記嘉興為東南水陸之衝運河經其城

隈延袤百餘里貢賦漕輓輻使皆出焉南極語兒境為

土塘北入聞川為石塘皆障水便陸自聞川以南處杭

嘉下流其水時大時小溢輒奔駛橫決傷沿河諸塘

而田者又依塘浚河行水溉田故塘益受傷其勢易敗

敗則石淪于河椿木戟立往往觸舟破之石去而土潰

塘斷如櫛途而緯者危怖不能度度則時有墊溺風雨

冰雪之候其患尤甚使有司者時省而謹修之其敗雖

易可以即完無患也顧今吏多視時令所須急堂陛跬

步間忽漫不省誰復介意水陸之行旅耶夏令日九月

除道辰角見而雨畢也十月成梁天根見而水涸也其

時微日火之初觀期于司里司空視塗陂澤梁川此先

王之政所以廣施德于天下者也左山趙公守郡率用

古道不隨時好為上下人急或舒之弛或張之惟民利

所在是力既濬城隍正經界易原隰塞圩導渠以即田

功乃丁未九月合屬邑司水者各修其塗而繕運河之

塘石塘起杉青迄聞川袤凡二十七里廣凡若干尺石

之淪于河者皆起而復之稍不足俾塘長出石官給其

需工皆堅完可久土塘起語兒迄西水凡百又十里亦

殘缺不治久矣併令新之凡再閱月而二塘告成皆坦



然如砥患去而利存途者歌舟者和田者歲登嬉遊以舞嗚呼觀今日之所喜則前此之患苦益又可知矣而世方忽民患而不省其知所省而急于興利已害者又輒來讒訾之口公獨信不疑挽今師古而事皆用濟使世之守令皆如公尚復遺利遺患有哉而於國家授時立政柔遠能邇之澤顧不旬宣傍達而益有光也哉公名瀛字文海關中三原人登己丑進士與予為同年佐是役者德化陳節判守義贛榆閩節判大祥玉山姜節推文序董役者嘉興則丁丞盛時秀水則蔡丞玉成諸君咸屬予言樹石津上以紀仁政示來者使修其蹟勿壞

鹽運河在海塘內長十二里為鹽運往來之所明嘉靖已

酉巡鹽御史董威重濬廣三丈有奇深六尺有奇康熙

六十一年知縣林緒光重濬

明陸杰鹽運河記略平湖東去海塘僅五十里塘以

外斥鹵內則為蕩荒茅無際業惟煮海在漢已然宋置權場于廣陳我朝移置於蘆瀝故有鹽運河十二里瀕

嘉興府志

卷二十九

水利

三

河之蕩漸治為田河日以淤商農屢乞疏導卒莫肯任者郡守趙公瀛議舉而未就嘉靖戊申冬巡漕監察御史近淮董公行部嘉禾會有商言河淤狀公急命郡倅陳君守義縣令李君僑相度修復期以責成于是程工計費秉心仰贊集丁夫一千三百五十人官為給餉郭丞亨出舍其間而日省之東自蘆瀝西屆廣陳計里分工以次具舉度三丈有奇深六尺有奇東西所訖加闢為灣周可五十丈便旋舟也河壩積土亦盡遠徙防傾圯也肇仲春畢孟夏夫以工計者二萬九千三百五十費出監察公贖金守倅令咸以粟繼秋毫不擾於民厥惟善矣趙守立石俞塘橋左屬俞紀畧云

新開河在鹽運河東自新倉閘橋起至舊衙計十二里明

嘉靖間知縣顧廷對濬河通地蕩以便灌溉又名顧公

河康熙六十一年知縣林緒光重濬

以上平湖王志

萬歷元年知縣蔡貴易濬運河自彭河橋至羔羊凡二十



里孫植濬運河記崇德邑治嘉郡之西為吳越閩廣孔道貢賦漕輓使四出邑之漕渠歲久不治自松老  
橋至六里橋水道淤涸漕舟告阻於是督薩馬公下之  
泉僉郡守檄水利郡判陸君會邑令蔡君躬歷周視計  
地程工為丈者二千六百三十計工程力計力程費擇  
委邑主簿高橋典史雷楫桐鄉主簿黃觀民典史馬驥  
畫地分工經始於癸酉八月至十月凡六逾旬而畢向  
有包角堰故址茲量為節宣勒石樹之以固風氣其於  
人文亦崇德十七年郡判方玘董治運河新志

白洋河在縣東沿海塘下南自澈浦北抵乍浦長七十里

明萬歷五年巡撫徐斌築塘海上因有白洋河及澈浦

上河之役白洋河北至閱武場而南屬常川舖長三十

里初鑿時以運塘石而海上荒土得灌為良田者萬餘

畝上河起自常川舖西南屬之澈浦城下二十里地形

嘉興府志

卷二十九

水利

古

稍高於白洋河築為土壩以捺之所灌田視白洋河加

倍浙江通志徐斌請開白洋河疏海鹽縣秦駐山南

輻輳田畝歲收稱為沃土近皆淤塞坍塌舟楫不通赤

地徧野原設澈浦稅課局因而裁廢早乾無備糧運艱

苦乙亥海溢之變澈浦軍民被災尤甚以石塘一帶外

無擁護內無分洩故也臣時營度海塘親履其地見田

廬荒廢目擊流離邇塘工告竣若將此河因其舊蹟再

為開通即以濬河之土築塘則所至該縣內河上塘一

體高厚深廣聯結鞏固縱有異潮之來不能衝突而田

疇得灌溉之資一水相通運糧道達遺惠軍民實為無

窮矣海鹽圖經先嘉靖九年有議鑿此河者知縣夏  
公浚力持之其言曰海塘形厚者僅七八丈薄者至四  
五丈以此捍海勢亦甚危昔周文襄嘗增土五丈於裏  
以防衝決其慮甚遠蓋築塘之法石必大始堅土必廣  
始固也今藉數丈之土以為基賴河身素淺堤勢不傾  
若濬此河萬一基薄而決雖盡鞭秦山石為之亦何所  
附如謂取土運石良便成大事者豈惜津搬小費與海  
爭利未見其可至萬歷乙亥此河竟開云又海鹽圖



經載開上河原文云量得自石鼓橋新濬河東起至常川鋪官路上原有舊河形迹止應加闊濬深又自常川鋪起至黃泥寨迤南至澈浦東關外近城濠河止或自高阜新開或因民地濬通其長二千二百二十五丈七尺再照此河一開不惟利於地方灌溉亦且便於衛所糧運議自石鼓橋至長川鋪計長一千三百二十三丈五尺每方丈該銀四錢計銀二千八百十六兩零聽委官典史陳柯管理同知黃清知縣饒廷錫往來提調其常川鋪起至澈浦城河每方丈亦宜給價四錢但此河大有裨益軍兵而軍兵月有銀一錢止給三錢共計銀一千五百三十二兩零分委指揮馬繼武督同千戶呂繼忠百戶余騰蛟等管理聽把總王三錫提調通計用銀三千六百一十九兩零 吳徐開濬白洋北河議本縣與海寧衛同一城池南四十里有澈浦所設立鮑郎鹽場北四十里有乍浦所設立海沙鹽場衙門俱在海濱脈絡其相聯貫所恃通行其間使防汎無虞鹽貨不阻者專藉沿海舊有白洋河一帶為之往來也祇因陵谷屢更以致涓流畫斷地方受病非止一端幸于萬歷初撫院徐栻修築海塘奏准水利道駐劄海鹽深燭利病將南路至澈浦鹽司四十里地開濬白洋上下河一帶

南行水路盡得流通其北路白洋河正擬興工值水利道陞任而止愚謂前南路河道種種利便備載海塘錄中若今北路之河為便亦可枚舉土塘捍海在北最低每當潮溢之時鹽場竈蕩民田盡被其衝所損不少若開河取土築塘令之高厚內河可以分洩其流外塘可以捍禦其患縱有非常民不受害此為一便乍浦所至海寧衛城俱是陸路不但彼中糧餉器械轉運為難抑且官兵分番調守往來不便今開此河則船隻通行聲息易達以之守望防汎更為得策此為二便海沙場司正處河之中途兩頭鹽運頗費搬移河開則舟載不難涇河遞相灌注脚價既省商賈因而樂趨不藉招徠鹽課自益此為三便土塘外為鹽場內即竈蕩今開河築塘攔阻潮頭則塘外零星灰埂盡可曲引鹹流開濬漉鹵塘內荒蕪草蕩亦得蓄積淡水墾作田疇四十里之內所增鹽課又不知幾何此為四便先此澈浦河道未通之時民病疋屢士鮮文學自開河後不但民無疾病亦且科甲連綿今乍浦一城何止萬家若得開濬河道將見人文日盛此為五便惟茲五便邑之商竈軍民望此舉已久在大有為者立斷而行之耳



萬歷八年知縣金和奉文修築圍岸令田主出本佃戶出力擇有行誼者董之岸身高三尺廣六尺九年本府同知方揚署縣竣其未就

呂字東北圩東根西根二圩皆極低窪遇水輒潦呂字圩先經縣丞倪璣開浜而未及築岸東西根參議喻良築壩而未及開河萬歷間知縣章士雅修呂字圩之岸更為築壩開東西根之河長一百七十丈廣一丈六尺更為建閘民感其德稱壩曰章壩河曰章河又三圩之稅以二折一故昔所棄而累民賠糧者今皆爭佃為業

嘉善章志

嘉興府志

卷二十九

水利

共

萬歷三十九年知縣靳一派開各區浜河因一都果字圩極窪三四都字字唐字圩東九都信字圩十二都善字圩極亢積荒賠累一派度地募民開閘家漚等河計灌田數千畝

崇德靳志

萬歷四十年知府吳國仕勘議郡城自杉青堰直抵王江

涇一帶運河舊塘土石各半歲久傾圯每霖雨即愁墊溺申請院司支海塘餘銀改修盡甃以石

嘉興湯志 郡人陳懋典

記畧吳公來莅郡慨然以築塘為己任周咨握筭不遺餘力始於壬子七月迄十月告竣人但見公成之之易而未始知公所以成之之難也夫舉大役者有三難曰議費曰議材曰議人初塘之估也擬八千金有奇而僅止秀水北塘其秀水之西塘及桐鄉崇德不與焉今公親度其緩急可仍可補者與必新建者估減其半而塘加



倍此卽主人自程量其百堵之興不啻也故取足修河  
歲額不煩別措加以商民樂輸一築塘必用木用石故事  
興而民不知也此其所難者一築塘必用木用石故事  
用木多而小今議減十之三而增壯焉又檄准解之官  
卽領鏹買木於瓜儀材皆申程而直甚平往者石工與  
藏吏相表裏價入手而石不時至稍急之聊以細石點  
綴數丈塞責今命官親詣石山頒式定值先給半價今  
其方舟而來驗收如式卽時全給石戶無不欣欣樂赴  
運石更番如織此其所難者二佐領幕僚幹局不同用  
非其任與用違其才皆足敗事公於諸屬吏衡照有素  
檄某某主某區人各樂於用用各當其才此其所難者  
三塘之功跨歷三邑秀水北塘一千四百八十八丈五  
尺西塘九百五十一丈六尺桐鄉二百一十五丈四尺  
洩水洞五座崇德塘三百六十一丈二尺三縣共計修  
築新舊塘三千二十七丈七尺吳公  
名國仕甲辰進士直隸之歙縣人

康熙六年十月知縣劉允楷縣丞季芷奉檄開濬運河石

鄭志 縣人夏方吳十議一南自松老橋北至玉溪鎮  
東高橋約三十里計六千一百七十七丈零分爲六段每

嘉興府志

卷二十九

水利

七

段分圖承挑其最淺處如迎恩橋起至司馬高橋止城  
灣一帶加工開深 一作霸需用竹木悉照民價買辦  
其固皮應預計需用若干勸令各典舖均助亦屬小費  
無不樂從 一兩頭大霸釘椿用石匠挑泥用淘沙匠  
每工給米二升匠不足則佐以里夫中間各壩仍著各  
圖自行填築 一車水卽照分段各圖派每圖糧見各  
出水車一具排列工所同時齊力耳水 一每圖出夫  
若干以派定丈尺開完爲度各甲照里派夫或圖中照  
甲畫開段落各自施工以免推諉以便分別勤惰稽察  
一照里出夫紳士概不免惟查本縣二百一十三里  
內有大荒圖四里熟中荒四里賦逋人逃難以派工計  
實在圖二百零五里一體均派 一就近撥圖以從民  
便但天寒暑短內有里夫路遠必須歇息者許于附近  
菴堂容畱不許拒絕亦不許作踐 一作霸宜有次序  
先於上游築一頭壩則去水自急瀉易涸然後以次築  
五壩然後於各段內填塞旁口以施車耳則力省而功  
倍 一六段宜每段設一掛牌上書某處至某處止計  
長若干丈水面應開闊若干水底應開深若干將派撥  
里分開列計丈分圖各自挑濬仍逐圖立一長木標以  
便識認 一沿河查點挨圖唱名里夫在河中答應不



許上岸擁擠既已畫界一圖自爲一隊不得踰越稍離  
工次仍著催差具一到單不到者卽行速催以免遲悞  
康熙十二年水溢塘圯知縣李見龍躬督修築幫闢堤岸  
至今便之秀水任志

秦河在縣東三十里新耕之蕩藉以灌溉康熙十七年里  
民秦九一倡議開鑿請於縣府委蘆漚場鹽大使周成  
勲董其役開河十里自新倉鎮以北至新廟橋荒蕩皆  
得栽禾後復稍淤二十二年春分守道王永祚檄行各  
屬疏通河道九一復呈縣委白沙巡檢姜一科及乍浦  
巡檢黃玃督同開濬闊五尺深數尺里人名曰秦河浙江

通志

嘉興府志

卷二十九

水利

六

康熙四十六年十一月奉

上諭江南省蘇州松江常州鎮江浙江省杭州嘉興湖州各府  
屬州縣或近太湖或通潮汐宜于河渠水口度地建閘隨時  
啟閉其支河港蕩淤淺者並加疏濬以資灌溉令督撫確察  
具奏知府臧憲祖奉檄查看得嘉郡七邑水勢無容建閘惟  
石門聖塘廟至玉溪鎮三十六里秀水西麗橋北麗橋端  
平橋三處共一百二十步嘉善渡船頭一里張涇匯三里  
楓涇鎮南柵一里此七處應加深濬經巡撫王然具題動  
帑完工

康熙六十年春知府吳永芳興修運河南塘加石培土又



北塘自城外至王江涇三十里於舊塘外間段增築石

岸

以上  
吳志

乾隆三十五年嘉興縣知縣王士澣開府城東門外市河  
起熙春橋訖東津亭里人馮浩記

邵灣周圍計田二千餘畝其水道漸淤塞遇旱卽荒乾隆  
四十一年里人張彥遠濬之未竣事而卒其子大經承  
父志復濬自南星橋玉獅子浜又繞東至邱家堰計三  
里有餘開深一丈六尺廣四五尺遂足灌溉二千餘畝  
之田遇亢旱亦無慮

以上  
新纂

歷代建言水利大略

嘉興府志

卷二十九

水利

九

宋景祐初范仲淹守蘇議導諸邑之水上書宰臣呂夷簡  
其略曰吳中之田非水不植減之使淺則可播種非必  
決而涸之然後爲功也昨開五湖洩去橫水今歲平和  
秋望七八積而未去猶有二三未能播種如總數道而  
開之災必大減蘇秀有秋之半利已大矣但今之世有  
所興作橫議先至非朝廷主之守土之人恐無建事之  
意矣蘇湖常秀膏腴千里國之倉庾也浙漕之任數郡  
之守宜擇精心盡力之吏不可以尋常資格而授恐功  
利不至重爲朝廷之憂且失東南之利也

熙寧初廣東安撫機宜崑山郝直上言蘇州水利直歿其



子將仕郎僑又上書大略言浙西田昔有營田司自唐至錢氏時其來源去委悉有隄防堰閘之制旁分其支脈之流不使溢聚以爲腹內畎畝之患是以錢氏百年間歲多豐稔惟長興中一遭水耳暨納土之後至於今日其患方劇蓋由端拱中轉運使喬維岳不究堤岸堰閘之制與夫溝洫畎澮之利姑務便於轉漕舟楫一切毀之初者故道猶存尙可尋繹今則去古旣久莫知其利營田之局又謂閒局冗職旣已罷廢則隄防之法疏決之理無以考據水害無已至乾興天禧之間朝廷轉遣使者興脩水利遠來之人不識三吳地勢高下與夫

水源來歷及前人營田之利皆失舊聞受命而來恥於空還不過遽採愚農道路之言以爲得計但以目前之見爲長久之策指常熟崑山枕江之地爲可導諸港而決之江開福山茜涇等十餘浦殊不知古人建立堤堰所以防太湖泛溢滄沒腹內良田今若就東北諸港決水入江是導湖水經由腹內之田瀾漫盈溢然後入海所以浩渺之勢常逆行而瀦於蘇之長洲常熟崑山常之宜興武進湖之烏程歸安秀之華亭嘉禾民田悉已被害然後方及東海又以水勢之方出於港浦復爲潮勢抑回所以皆聚於太湖四郡之境當歲歲積水而上



源不絕瀾漫不可治也此足以驗開東北諸港爲謬論矣案此書載范成大吳郡志其意專重堰閘轉以開東諸港爲謬實非通論因郊氏父子以水利著名故錄而辨之

紹興五年二月寶文閣待制李光言明越之境皆有陂湖大抵湖高于田田又高于江海旱則放湖水溉田潦則決田水入海故不爲災慶歷嘉祐間始有盜湖爲田者三司使切責漕臣甚嚴政和以來創爲應奉始廢湖爲田自是兩州之民歲被水患壬子歲嘗取會稽餘姚上虞兩邑利害自廢湖以來每縣所得租課不過數千斛而所失民田常賦動以萬計遂先罷兩邑湖田其會稽

之鑑湖鄞之廣德湖蕭山之湘湖等處尙多望詔漕臣訪問應明越湖田盡行廢罷其江東西圩田蘇秀圍田併遍下諸路監司守令條上詔諸路漕臣躬親相度以

聞

乾道六年三月監進奏院李結獻治田三議曰務本日協力日因時大略謂浙西低田恃隄爲固若隄岸高厚則水不能入乞于蘇湖常秀諸州水田塘浦要處官以錢米貸田主乘此農隙作堰增令高闊則堤成而水不爲患方此饑饉俾食其力因其所利而利之秋冬旱涸涇浜斷流車畝修築尤爲省力詔令胡堅常相度以聞其



後戶部以三議切當但工力浩瀚欲曉有田之家各依鄉例出錢米與租佃之人更相修築庶官無所費民不告勞從之

淳熙二年監察御史傅淇奏近臣僚奏陳圍田湮塞水道之害陛下復令監司守令禁止圍裹此乃拔本塞源之要術然豪右之家未有無所憑依而肆意築圍者聞浙西諸縣江湖草蕩計畝納錢利其所入給據付與望條約諸縣無得給據上曰此乃侵占之田今絕其源後去無復此患可令漕司常平司察之

元大德時臣僚奏太湖澱山湖昨嘗奏過先帝差撥民夫三十萬疏掘已畢今諸河日受兩潮漸至沙漲若不依舊宋例令軍屯守必致坐隳成功澱山湖圍田賦糧二萬石就以募民夫四千與同屯守立都水防田使司職掌收捕盜賊修治河渠圍田有旨從之

元周文英三吳水利書略曰蘇湖常秀土田高下不等以十分爲率低田七分高田三分所謂天下之利莫大于水田水田之美無過于浙右五代末吳越錢王獨居東南專享此利宋范文正公嘗論于朝曰江南圍田每一圍方數十里中有河渠外有門閘旱則開閘引江水之利澇則閉閘拒江水之害旱澇不及爲農美利嘗詢訪



高年云曩時兩浙未納土時蘇州有管田軍四部又有  
撩淺夫專爲田事導河築隄以減水患文英嘗經行太  
倉劉家港及吳淞江之左右隨流尋源劉家港南有一  
港名南石橋港近年天然深闊直通劉家港西南通橫  
塘以至夏駕浦入吳淞江其中間有迂迴窄狹處若使  
疏浚深闊則太湖洩水一大路也某今棄吳淞江而勿  
論專意于劉家港卽古婁江三江之一也水深港闊此  
三吳東北洩水之尾閘斯所謂順天之時隨地之宜也  
惟開浚之法照依捨糧賑濟例優以官祿宜定品級考  
其成功優以一官激功勉勵庶幾成此美績則可弭浙

西數郡久遠之災寧不偉歟

元任都水水利議議者曰錢氏有國百餘年止長興間一  
次水災宋南渡百五十餘年止景定間一次水災今或  
一二年三四年水災頻仍其故何也答曰錢氏及宋南  
渡全藉蘇湖常秀數郡所產以爲國計常時盡心經理  
高田低田各有制水之法其間水利當興水害當除合  
役軍民不問繁難合用錢糧不吝浩大必然爲之又使  
名卿重臣專董其事豪富上戶簧言不能亂其耳珍貨  
不能動其心又復七里爲一縱浦十里爲一橫浦田連  
阡陌位位相接悉爲膏腴之產以故二三百年之間水



災罕見國朝四海一統又居位者未知風土所宜視浙  
西水利與諸處無異任地之高下任時之水旱所以三  
二年間水旱頻仍也議者曰水旱天時非人力所可勝  
自來討究浙西治水之法終無寸成答曰浙西水利明  
白易曉何謂無成大抵治水之法有三浚河港必深闊  
築圍岸必高厚置閘竇必多廣設遇水旱就三者而乘  
除之自然不能爲害倘人力不盡而一切歸數于天寧  
有豐年耶東坡亦言浙西水旱乃人事不修之積正此  
謂也昔范文正公親開海浦議者沮之公力排浮議疏  
濬積潦數年大稔民受其賜載之方冊昭然可考謂之

無成可乎議者曰河港圍岸閘竇三者俱備則水旱可  
無民食可足誠爲久遠之計朝廷何爲而廢之答曰范  
文正公宋之名臣盡心于水利嘗謂脩圍開河置閘三  
者備矣水旱豈足憂哉國家收附江南三十餘年浙西  
河港圍岸閘竇無官整治遂致廢壞一遇水旱年年荒  
蕪深可痛惜今朝廷廢而不治者蓋募夫供役取辦于  
富戶部夫督役責成于有司二者皆非其所樂所以猾  
吏豪民搆扇必欲阻壞而後已朝廷未見日後之利但  
厭目前之擾是以成事則難壞事則易東坡亦云官吏  
憚其經營百姓畏其出力所以累行而終輟不能成久



遠之利也

明永樂元年八月以蘇松水患爲憂遣僉都御史俞士吉齋水利集賜夏原吉使講究拯治之法至是原吉上奏曰浙西諸郡蘇松最居下流嘉湖常三郡土田下者少高者多環以太湖亘五百餘里納杭湖宣歙諸州之水散注澱山等湖以入三泖頃爲浦港湮塞匯流漲溢傷害苗稼拯治之法要在濬滌吳淞諸浦港洩其壅遏以入于海案吳淞江舊袤二百餘里廣百五十丈西接太湖東通大海前代屢疏導之然當潮汐之衝沙泥淤積屢濬屢塞不能經久自吳江長橋至夏駕浦約百二十

嘉興府志

卷二十九

水利

三

餘里雖云疏通實多淺窄自夏駕浦抵上海縣南澹浦口可百三十餘里沙草壅障已至平陸工費浩大難以成功臣等相視得嘉定之劉家港卽古婁江常熟之白茅港皆係大川水流峻急宜濬吳淞江南北兩岸安亭等浦港以引太湖諸水入劉家白茅二港使直注江海又淞江之大黃浦乃通吳淞要衝今下流壅塞難疏旁有范家浜至南澹浦口可徑達海宜濬令深闊上接大黃浦以達泖湖之水此卽禹貢三江入海之蹟俟旣開通相度地勢各置石閘以時啟閉每歲水涸之時修築圩岸以禦暴流如此則事功有成于民爲便上從其言



命集民丁開濬

宣德七年九月蘇州府知府况鍾上言蘇松嘉湖之地其湖有六曰太湖曰麗山湖曰陽城湖曰昆承湖曰沙湖曰尚湖聯屬廣袤凡三千餘里其水東南出嘉定吳淞江東出崑山劉家港東北出常熟白茅港永樂初朝廷命尚書夏原吉疏濬水不爲患年久淤塞一遇久雨遂成巨浸田皆沒溺乞仍遣大臣督各官于農隙時發民流濬一方永賴上命周忱與鍾計功力多寡難易以聞正統五年正月令天下有司秋成時修築疏濬陂塘以便農作具數繳報俟考滿以憑黜陟是年巡按直隸監察

御史蕭啟言蘇松嘉湖常五府賦稅太多而湖堤漸壞恐傷民田且往來舟楫不便請令巡按御史及按察司罰五府囚徒輸作者送巡撫侍郎周忱處遣官督之修隄隄完令長橋平望二巡檢司巡邏庶東南無逋租上可其奏

正統十四年巡撫牟俸言直隸蘇松與浙西各府頻年旱澇緣周環太湖乃東南最窪地而蘇松尤最下之衝故每逢積雨衆水奔潰湖泖漲漫滄沒無際案太湖卽古震澤上納嘉湖宣歙諸州之水下通婁東吳淞三江之流東江今不復見婁淞入海故跡具存其地勢與常熟



福山白茆二塘俱能導太湖入江海使民無墊溺而土可耕種歷代開濬具有成法本朝亦常命官修治不得其要而濱湖豪家盡將淤灘栽蒔爲利治水官不悉利害率於泄處置石梁壅土爲道或慮盜船往來則釘木爲柵以致水道埋塞公私交病請擇大臣深知水利者專理之設提督水利分司一員隨時修理則水勢疏通東南厚利也帝卽令俸兼領水利聽所濬築功成乃專設分司

宏治五年七月南京戶科給事中楊廉等以災異言近年兩浙三吳水災相仍穀米踊貴說者謂蘇松嘉三府財

賦所出當天下之半而其地極下禹貢所謂震澤者在今蘇之吳縣其水由吳淞江入海元時亦嘗疏濬民受其利今淤塞不通豪右復築之稼穡其上遇雨水稍多則無所于泄泛濫數郡良田無秋民非不欲疏濬也制于豪右卒不能成乞勅相度震澤入海之處設法疏濬仍令各處導渠修堰以備旱澇下所司知之

宏治十六年六月刑部主事劉喬言蘇州嘉興等府縣各設水利等官騷擾地方漁獵編戶乞量爲裁革府責同知縣責典史帶管直隸則管河郎中浙江則水利僉事巡視董治之下其奏于所司



嘉靖十年五月行人朱隆禧以齋詔南直隸各府還上所  
過利病四事一重水利謂蘇松嘉湖各有治農官然而  
溝洫淤沕圩堤圯散惰農蕪業所在而是則官不循行  
之故也宜勅令農隙之時循行阡陌勸課農桑修濬溝  
洫隄堰務使旱澇有備從之

嘉靖四十二年給事中張憲臣言蘇松常嘉湖五府水患  
疊見請濬支河通潮水築圩岸禦湍流其白茆港劉家  
港七浦楊林及凡河渠河蕩壅淤沮洳者悉宜疏導帝  
以江南久苦倭患民不宜重勞令酌濬支河而已

隆慶三年九月浙江撫臣谷中虛言浙江與蘇松之水其  
源皆出天目諸山本自聯絡今巡鹽御史兼理蘇松水  
利而不及浙江浙江水利僉事能行于浙江而不能行  
于直隸非專官督理難責成功宜勅巡鹽御史兼理浙  
直水利在浙江督水利道在直隸督兵備道各隨宜修  
濬以防水潦之虞工部請從其議報可

萬曆四年巡撫宋儀望言三吳水勢杭嘉湖常鎮繞四隅  
蘇州居中松江爲諸水所受最居下乞專設水利僉事  
以裨國計部議遣御史董之

萬曆六年巡撫胡執禮請先濬吳淞江長橋黃浦先是御  
史林應訓言蘇松水利在開吳淞江中段以通入海之



勢又言宜開龐山湖口由長橋抵吳家港則湖有所洩  
江有所歸又言松大黃浦西南受杭嘉之水西北受澱  
泖諸蕩之水總會於浦而秀州塘山涇港諸處實黃浦  
來源也澱山湖入黃浦道漸多淤淺宜爲疏濬而自黃  
浦橫澇洙涇經秀州塘入南泖至山涇港等處百四十  
餘丈待濬尤急八年又言蘇松諸郡幹河支港凡數百  
大則洩水入海次則通湖達江小者引流灌田今吳淞  
江白泖塘秀州塘蒲匯塘孟瀆河舜河青暘港俱已告  
成支河數百宜盡開濬

萬曆三十七八年間霪雨浸溢水患日熾越數年給事中

歸子顧言宋時吳淞江闊九里元末淤塞正統間周忱  
立表江心疏而濬之崔恭徐貫李統嗣海瑞相繼濬者  
凡五迄今四十餘年廢而不講宜使江闊水駛塘浦支  
河分流四達疏入畱中

國朝康熙十年五月秀水縣知縣李見龍條議看得秀水一  
邑澤國也水之來也有三吳江以太湖之水北至歸安  
以苕霅之水西至仁和德清海寧以天目之水南至其  
去也則一沿城而東經善平二邑入泖以入于海此其  
大較也無高山之限而有巨壑之通城北官塘中挽道  
正當西來諸水衝鬪之處立橋爲門自王江涇起有聞



店橋六里橋金橋百步橋至城西偏爲柵堰橋皆所以洩水使出也官塘上下每區有圩每圩有港皆從東出瀦爲大洋受水之歸而水傍田畝各築圩岸旱則車水使入澇則車水使出蓄洩以時人工丕作以是禾中最窪下之田畝收數鍾稱爲沃壤禹貢揚州所謂厥田惟下下厥貢下上上錯也鼎革之餘盜艘充斥前奉趙督臺檄塞各路港門而六里橋金橋大兵經臨幫闢堤道五馬並行橋因之塞嗣後水行旣駛墓脈復傷地絕民貧風景蕭索矣庚戌夏洪水突來無路放洩瀾漫數旬禾黍盡淹此災百年僅見固天時弗若亦人事之不修

築港塞橋爲弭盜計而合之河渠水利諸書竟有大謬不然者禹之行水行所無事蓋導之使行非遏之使不行也今蒙憲行查議水利蓄洩之法相度地勢莫如疏通各水港使水之來也有門去也有路不知以障川爲潰川之舉實爲今日第一義或盜氛叵測則用水椿蓋以大石通水而不通舟亦可無慮也惟入海之地爲江南松屬所轄仰望憲咨移會俾彼處自行料理非卑職所能越俎而代庖者也

王庭曰禾地平行水患之須堤堰者尙少所患乃在淤塞如城鎮則以民居旁填土而河日窄鄉村則以民田地



旁填土而河亦日窄當事務為姑息每議開河只言開  
深不言開闊城中如此鎮與鄉更無有言及者矣是大  
可慮也

袁志

曹溶曰禾中水法自雨天日來舊從東北流去經平湖嘉  
善入海半下杉青閘入太湖至近歲北鄉居民因盜艘  
出沒將閘外南塘諸流築壩斷塞致水變為南流阻絕  
西來生旺反令墓水到堂三十年來戶口蕭條皆由於  
此莫若將北門外塘灣起至平望五十里凡南塘土堰  
盡行挑去改用木柵既使水勢通流順趨入海又無盜  
艘出沒之患此郡復古第一急務也

袁志

嘉興府志

卷二十九

水利

三

知縣何誌曰嘉邑四境地勢北低南高溪流北駛南澀自  
分縣後盡屬高鄉較秀水旱多澇少一遇燠乾之歲水  
車或二三接始得漑田者若圩大浜淺車岸莫施則坐  
而待槁宜令南鄉各圩塘長務將近境河港浜澗歲加  
深濬庶使灌溉不竭茲邑無事堤堰政宜濬河此為先  
務之急

嘉興何志

縣北境大率水鄉皆通潮汐獨南境傍海一帶東起獨山  
西至雅山港汊絕少淤澱過甚一遇旱暵束手無策宜  
倣海寧備塘河一體開鑿則斥鹵之地可冀有秋利不  
僅在百年已

平湖高志



案以上五條其論皆深切著明實可  
施行者故附錄於建言各則之後

歷開府城河暨各縣城河

城內河渠與外隍表裏相因通舟楫以利民用所宜時加  
宣導勿使壅闕者也自永樂乙酉左通政趙居任奉詔  
治水嘗疏之至成化初郡守揚繼宗議復浚不果至今  
百四十年不治瀕河而屢者日規月侵至或併故道塞  
之而屋廬其上有司畏謗譴莫問也嘉靖丁未秋知府  
趙瀛乃考索圖志咨訪故老悉加浚復於是水泉饒給  
舟楫通利趙圖記

嘉靖二十六年郡守趙瀛開濬市河凡故渠之湮廢者浚

嘉興府志

卷二十九

水利

三

之民居之侵隘者卸之橋塊之垢滯者闢之復令里出  
一舟運土至南湖中以培樓址殫力任勞大興水泉舟  
楫之利其後歲久漸淤至崇禎間郡守鄭瑄始復疏濬

流通

吳志

康熙十四年冬知府盧崇興開濬城內外水道至十五年

春畢工有告諭條約載崇興所撰守禾日記

新纂

康熙間郡守劉瑄修賦偉壘經開濬

案劉於康熙二十二年任修於康熙三十

八年至四  
十一年任

康熙六十年夏知府吳永芳以城內河道淤淺鳩工大濬  
并支流小港以次疏通時正值脩塘凡河中土礫悉令



運出填作塘路是年秋旱城河舟楫通行汲溉便利舊時居民跨河造房名爲水閣實碍河道悉遣除去止架木橋著爲令

以上吳志

乾隆五十年知府方林開濬城內各處河道

嘉慶二年知府伊湯安捐廉開濬子城四圍水道及東門

南門北門各市河委司獄陳宗禮縣丞鄭喬年往來督

率越兩月而工竣其府治西錦帶河積久填塞今可通

舟民尤便之

以上新纂

康熙二十三年知縣崔維華督濬城河先因三冬水涸糧

一戶運漕爲艱維華乘初春政暇令各坊預加開濬

嘉興府志

卷二十九

水利

三

康熙二十八年知縣李之藻令在城諸坊就所居廣隘各

自開挑河道

康熙五十二年春知縣梁文煥開濬學宮文水河

康熙六十年知縣彭憲祖督濬城河又雍正八年春知縣

邵煜以城河淤塞徧加疏濬往來利濟民甚便之

以上嘉善

志

城濠年久侵淤每遇漕米出兌有害短撥康熙元年邑人

張給諫惟赤捐資開濬天寧寺西至城內便民倉一帶

河道共三百六十丈并四門城濠共計一千八百六十

二丈六年知縣湯其升勸諭募夫委耆民蔡維祺等開



濬便漕城河若干丈

海鹽續圖經

雍正二年知縣林緒光開濬城內河道

城內水道西自漢塘河來者逕西水門出東水門為市河

其一支曰新開河久塞俗稱乾河乾隆乙丑重開

知縣高國

盈濬復清水巷故河并築松風港東西兩堤記略縣治東南清水巷舊有港由小滑橋北流達市河自明季以來淤成陸地屋其上者三十餘戶歲乙丑邑士張慎言等以濬復請進而叩之則已捐資有人經理有人於凡居民之屋計隊而授費余嘉之遂為上請報可慎言等又曰城北松風港為北流之委舊嘗築隄堵塞自勢家開通而吾邑以病請以浚河泥土畚而置諸此復築舊隄余曰塞之使村農運載多阻是有利有不利也今莫若創為東西兩隄中隔尋丈如錯指如交齒然隄之自東出者畱西岸丈計勿築西亦如東制庶幾北注之水紆曲不能直瀉而農舟仍得便眾唯唯旬月而功俱成遂為之記

嘉興府志

卷二十九

水利

三

乾隆二十六年知縣劉純煒四十一年知縣劉雁題先後

勸捐重濬市河

以上平湖王志

宋紹定間知縣樓演濬縣前河東達運河西至陸家灣

明嘉靖三十九年知縣劉宗武大濬城河

明萬曆三十八年知縣靳一派大濬城河及石門灣

以上崇德

靳志

城中之水自運河來溪流曲折進北水門經迴泮橋折而

西過來鳳橋鳳鳴市河上南經馮家河西集鳳橋而出

南水門至八字橋逶迤分流而達南鄉一由學橋之下

直出東水城門惟西水門歷久不開水滿則通水淺則



塞城內有祁家漾其水大旱不竭  
桐鄉徐志 案桐鄉城河縣志未載疏濬

事宜其水至今深通

各縣各鄉原隰高下形勢各河港數各圩數  
照錄趙圖記

嘉興地惟坦夷政宜濬河鮮堰閘其附城大河一支河四圩九其德化之都大河一支河二十一圩三十二胥山之都大河一支河十六圩三十一感化之都大河一支河十九圩四十移風之都大河二支河十圩一十七里仁之都大河一支河三十圩四十七新豐之都大河一支河十圩二十二永豐之都大河二支河一十六圩四十七白苧之都大河一支河十圩二十二大彭之都大

嘉興府志

卷二十九

水利

三

河二支河一圩二十一嘉會之都大河一支河一十七圩三十六長水之都大河一支河一十五圩三十五秀水原隰不齊政宜節宣宜脩圍置閘其城中坦夷大河四支河一市河一十八圩一白苧之都坦夷支河六圩二十五象賢之都東區坦夷支河七圩二十五象賢之都西區高平大河一支河十圩十五靈宿之東區亢極大河一支河十圩八靈宿之西區亢極大河一支河一十九圩一十一雲泉之都或原或窪大河二支河一十六圩二十八柿林之都日二十七為中窪大河一支河十圩三十一柿林之都日二十八或原或窪支河一十



五圩五十復禮之都曰二十九或原或窪大河一支河  
十圩三十六復禮之都曰三十爲中窪支河十六圩二  
十一永樂之都曰三十爲中窪大河一支河十圩二十  
永樂之都曰三十一或原或窪大河三支河十一圩四  
十五思賢之都曰三十二爲中窪大河二支河十八圩  
六十二思賢之都曰三十三其東區至窪大河三支河  
十圩七十一其西區至窪大河一支河十四圩七十六  
麟謔之都爲中窪大河二支河二十四圩七十九

嘉善原隰錯出政宜濬河節宣下保東區爲中窪大河二  
十支河四十圩四十下保西區爲中窪大河一十七支

河二十一圩六十一思四區大河一十五支河三十圩  
二十四遷東區大河九支河三十圩二十四遷西區大  
河十三支河二十一圩二十九遷南區大河七支河五  
十一圩二十遷五中區大河一十三支河一十四圩一  
十二遷五北區大河二十二支河六十四圩四十六麟  
五區大河一十一支河一十三圩二十六麟七區大河  
六支河一十三圩八永七區大河九支河二十七圩一  
十八永八南區大河十支河二十六圩二十三永八中  
區大河一十二支河一十九圩二十八永八北區大河  
二十三支河四十三圩六十一奉九南區大河十一支



河十五圩二十八奉九北區大河二十支河二十六圩  
六十六奉四南區大河一十二支河二十四圩二十一  
奉四中區大河二十四支河二十四圩三十二奉四北  
區大河一十九支河四十九圩八十二胥五區大河六  
支河二十二圩一十六

海鹽原隰不齊政宜節宣多堰閘一都東區大河二支河  
十圩八西區大河一支河八圩七三都區大河一支河  
九圩一十四都區大河一支河十圩七五都區大河一  
支河一十六圩十六都區支河一十九圩二十一七都區  
大河三支河四圩一十四九都區大河一支河一十一

圩一十六十三都西南區大河二支河八圩七東南區  
河湖五圩五西北區大河二支河一十二圩九東北區  
大河一支河九圩七十四都東南區大河一支河九圩  
六西南區大河一支河十圩六東北區大河一支河七  
圩一十三西北區大河二支河七圩七十六都東區大  
河一支河一十四圩九十六都西區大河一支河八圩  
九

平湖原隰不齊政宜節宣宜多堰閘原什之七隰什之三  
其亢極爲東十九都河三港三圩六二十都河二港三  
塘一浜一圩一十三十七都河一港一十一圩一十二



西十九都河一港七塘一圩九齊二十二都涇港九圩  
九二十三都塘一港二圩六二十四都港六圩六零二  
十四都河一港三圩三二十一都湖一港九洋一圩一  
十一華二十二都港六圩六二十五都塘六港二圩五  
崇德原隰不齊政宜節宣宜堰開宜爲小區高其圍其極  
窪爲一都區浜河一十七圩一十九十五都區浜河九  
圩一十八十六都區浜河一十五圩二十二十八都區  
浜河一十三圩二十十二都東區浜河十圩五十四都  
區浜河二十二圩三十四十三都西區浜河一十三圩  
八西二都區港河三圩四四都區港河八圩八九都西  
十三都區浜河一十一圩九

嘉興府志

卷二十九

水利

三

桐鄉原隰等差政宜節宣宜堰開其亢極爲八都西區浜  
港六圩十八都東區浜港四圩八八都西區浜港二圩  
四其高平爲六都南區浜港三圩三十六七都東區浜港  
三圩三七都西區浜港四圩七三十都中區浜港三圩  
三三十都西區浜港三圩三三十都東區浜港三圩三  
三十一都東區浜港三圩四三十一都西區浜港五圩  
四三十一都北區浜港四圩四其坦夷爲二十都一區



浜港三圩五二十九都南區浜港四圩三二十八都東區浜港四圩四二十八都西區浜河五圩五二十九都東區浜港五圩四二十九都西南區浜港五圩四二十九都西北區浜港五圩四其原隰不齊二十都中區浜港五圩二二三都中區浜港七圩四二十三都東區浜港二圩四十三都西區浜河四圩四二十五都南區浜河四圩四二十五都中區浜河二圩三二十五都北區浜河四圩四其中窪為二十六七都東區浜港四圩四其西區浜河四圩四其中區浜河四圩三二十四都東北區浜河六圩四其中區浜河四圩四其極窪為二

嘉興府志

卷二十九

水利

堯

十都西區浜港四圩七二十四都北區浜河五圩四

案趙圖記論列各縣各鄉原隰形勢頗得要領惟郡境水道至繁自長川巨浸以及支浜曲汊不啻千萬計圖記所開為數甚畧或當日僅就里胥冊報書之難以憑準但袁志吳志相沿登載已久一時無從更正故仍照錄原文俟異日覆核者藉為張本可耳

各堰閘壩

嘉興縣

白苧堰 在縣東南三里

案張堯同百詠題作白苧橋則在宋時此堰已開至元志時仍

其舊稱耳其橋為澎湖之咽喉最利通流昔人曲為之防蓋失計也

馬塘堰 在縣南七里

今久廢詳見山水門

六里堰 在縣東五里

以上至元志今久廢



盛家堰 在新行鎮北吳志

鄭公隄 在會龍寺兩腋明崇禎間知府鄭瑄築歲久漸圯

國朝康熙六十年里人高孝本白于郡守率眾重築兩隄以

節嘉善平湖之去水浙江通志

施洪港壩 施洪港在縣東二十六里東北接伍子塘正

德間豪戶築壩阻塞里老施顯等呈縣委喬典史親臨

起夫開濬嘉靖末年又塞耆民萬忠告縣捐貲復開嘉

靖四十四年十月知縣范崙給帖執照嘉興湯志

鰻鱧堰 在六里街東津亭對岸舊有此堰不知名所起

嘉興府志 卷二十九 水利 旱

或稱萬里堰雍正間開河濟鹽運堰廢新纂互見山水門

麒麟壩 在縣東十數里漢塘之南岸土人所築時塞時

通新纂互見山水門

秀水縣

杉青堰 在嘉興縣北四里至元志案時未置秀水縣故隸嘉興下同 熙寧

元年十月詔杭之長安秀之杉青常之望亭三堰監護

使臣並以管幹河塘繫銜同所屬令佐巡視修固以時

啟閉從提舉兩浙開修河渠胡淮之請也宋史渠河志今堰久廢

冬瓜湖堰 在嘉興縣北三里至元志今久廢詳見山水及叢談

柵堰 在嘉興縣北三里至元志今堰已開通柳志案堰處今改橋府



城西北新城塘河遠承茗溪爛溪之水而來全賴此橋為咽喉要地其水非惟濟運實形勝所關不知何時築堰過來源而傷地脈貽害非淺今亦未詳何年所開當在明永樂間夏忠靖治水時也

學秀堰 在嘉興縣西南九里 今久廢互見古蹟

杉青閘 在嘉興縣北四里 以上至元志今久廢

浙江通志秀水水利大略與嘉興相似境內少堰霸至元志所載今皆不存土人猶以堰名其地云

嘉善縣

伍子塘壩 康熙六十一年重築伍子塘壩壩在柳洲亭

後闔邑風水攸關自明季知縣李陳玉勅建以來時築

時開至是里人錢以坊等倡捐重築 嘉善戈志

彭家堰 在八中區宙字圩

嘉興府志 卷二十九 水利 壘

萬家堰 在九南區三豐圩

孟家堰 在四南區小豐圩南婁縣界 以上新纂

石井長春等三壩 嘉慶四年嘉善知縣萬相賓脩復三

壩 新纂 知縣萬相賓記略嘉善嘉興析色也水從郡城上下兩塘而來匯張涇而去生于申旺于子庫于

辰惟蘆墟長春二塘先走而北生氣洩矣於是設石井長春二壩以障之城北伍子塘水當子位又洩矣於是

有柳洲亭以銜之猶耗也壩以截之蓋自前明劉公創為美舉章公繼其事三壩之來久矣今惟長春壩尚在

稍頽塌焉石井伍子塘壩曾有私講開通者前令答之而止乾隆三十年為吏憲所開鄉人不敢言伍子塘壩

康熙九年大水為漁人所毀壬寅前令彭公從紳士請築之乾隆二十八年梁公復脩而勒石焉旋以市民私

籲而掘改議木柵卒未建嘉慶四年冬脩縣志士大夫紛紛以請予曰旨哉是誠余責也乃告耆老帥鄉正均

力作具畚插十日而石井伍子塘成又五日而伍子塘壩成乃以餘力及于長春壩壘石而增之于是三壩皆



復

海鹽縣

張泥堰 新朱堰 錢涇堰 周大堰 許家堰 徐涇

堰 落匯堰 右隸開濟鄉至元志案浙江通志開濟鄉內又有周撤堰孟家

堰

干涇堰 錢家堰 丁匯堰 朱涇堰 練浦堰 陶涇

堰 白塔堰 孔家堰 右隸永寧鄉

徐涇堰 鐵城堰 黃泥堰 高峰堰 大王堰 小華

家堰 大華家堰 東吳市堰 西吳市堰 右隸長

水鄉以上至元志案浙江通志長水鄉內又有板層堰董涇堰談家堰棠成堰

嘉興府志

卷二十九

水利

望

北橫涇堰 彭村湖堰 楞巷堰 馬家堰 滕家廟堰

倪家堰 龐家堰 楊家堰 衛港堰 六里堰別見後

三里堰 孫家堰別見後 湯家堰 右隸德政鄉至元志

案浙江通志德政鄉內又有沈家堰

案浙江通志宋嘉祐元年縣令李維幾置鄉底堰三十餘所後亦漸廢淳熙九年守臣趙善悉興脩水利增築

鄉底堰八十一所又云海鹽古堰圖經所載有一百四所自析平湖後本縣所存止四十有二後亦漸廢案

今通志所開凡四十有四堰

六里堰 在鎮西六里高下相去數仞為澉浦灌田隄防

之所宋澉水志明萬歷間知縣李當泰里人朱文才錢魯南許星石倡捐脩築以固坊圍於深

底遇旱則引下河之水以灌田吳中偉有碑記國朝嘉慶二年里人重築



孫家堰 在鎮西南四里 宋澈水志 乾隆二十四年海

洩水民甚病之三十四年知縣韓本晉知府李允升杭

嘉湖道寧武立勘詳重復古堰吳懋政有永安湖水利

新河堰 一名新在澈浦東門外 續澈水志 彭孫適重復

曰澈城澈城踞山海之交地勢高亢土雜砂石瀉鹵水  
淺而狹旬月不雨即罹旱災歲十八九其循城而流者  
為壕河壕河西流四里有堰曰角里角里堰之下即  
通河也出東門循壕河東北行百餘步有堰曰新河創  
濬於故明萬歷間其始濬也自澈城東北十里白洋河  
盡處起工迤邐西南去壕河不盈七尺即訖工畱作新  
河堰越數十年新河土淤水盡注白洋河又於嚮起工  
處築常川壩以阻之緣新河至常川壩草蕩十餘頃舊  
制分隸離戶取薪煮海官稅纖微邇年悉事畊稼所得  
倍蓰然水澤往往不給康熙十七年其離戶之黠者與  
非離戶而無良者比黨畫計謂去新河堰則二水相通  
有麗澤之益以此告於張令君張令君不暇察也為請

嘉興府志 卷二十九 水利 聖

于上官遂壞新河堰其秋壕河之水盡輸新河蕩有收  
而田不稔次年春土民聚而請于張令君曰堰不復是  
有河而無河有田而無田也唯令君有以命之張令君  
復為黠者所惑謂澈人之故違其令也必不肯復新河  
堰於是新河堰不果復二十年侯令君下車次年春澈  
人請復堰令君瞿然曰前令上請而壞堰吾下狗而復  
之是以縣令抗上官也大不可士民懼而聚謀曰壞堰  
以來水竭歲祲吾澈之人亦病矣不及今上籲是遺令  
君以憂也遂合詞控於郡守袁侯袁侯拘黠者與士民  
庭訊焉下令曰新河堰載在邑乘不可壞也且吾聞濬  
壕以衛城未聞濶壕以危城也况澈地瀕海一旦烽燧  
有警何所藉以飭備禦乎以此請於參政某公某公是  
之即為轉請於方伯麟憲巡撫方伯麟憲巡撫是之于  
是亦新河堰得果復士民驩呼相慶曰堰之復澈民之大  
幸也然非郡侯之明斷何以致此不可不勒石以垂永  
久相率謁某君貽書都門具述願末求余文以為記余  
惟政之大要在因革因所當因雖循常而不為苟安革  
所當革雖創始而不為喜事自朝廷下迨郡邑莫不皆  
然不知其道則拘謹者畏難而憚改作剛果者好動而  
多變更其不至於病民者幾希矣昔漢召信臣守南陽



為百姓開渠溉田數萬頃其民稱為召父蓋水利之於人也用力省而就效速及物博而垂世遠非僅一時煦濡噢咻之恩澤所可同日而語者也信臣之利人也善于革袁侯之利人也善於因所為雖異而惠民則同噫激之人其尚世守勿失食力茲土以歌詠郡侯之功德於無窮而凡蒞吾邦者誠能有鑒于此諸所措置設施致詳因革之當卓然不為黠者所惑則蚩蚩之氓庶有賴乎此則士民請文之意也是用書之以詔來者其郡侯讞語暨各憲詳允載在碑陰不具述

常豐閘 在縣北四十里閘口闊一丈二尺兩塊各高一

丈六尺五寸至元志 宋嘉祐元年縣令李維幾植木為閘

元祐四年何執中為令易以石淳熙十五年縣令李直養蓋閘屋易閘板自是農被閘堰之利頻歲得稔後以舟楫通行不便閘竟廢今俗呼其地為橫塘牖是也浙江

嘉興府志

卷二十九

水利

四

通志

永安湖閘 在北湖口

宋澈水志

張老人閘 在中河東

續澈水志

嘉慶四年知縣任澤和捐貲

脩築新纂

轉水閘二座 成化年間本府通判張岫相視高下置閘

二座至今民受其利續澈水志

浙江通志海鹽據禾城上游環山濱海水無停滯惟藉官塘一帶以灌十鄉之田每十日不兩車耳一動則其水立涸農田龜坼是以堰閘之設較他邑尤為急務古人多置堰閘以阻遏水勢每歲二月築塞九月始開誠善政也後人以舟楫阻滯毀諸堰閘以快目前之便不知水無所瀦一遇亢旱動輒告災此由堰閘之廢弛故耳



平湖縣

十八里堰別見後 白馬堰 李家堰 孫堰 沈駝堰

孫三堰 馬廐堰 右隸武原鄉

玉山堰 小山涇堰 鍾磬堰 湖口堰 小黃泥堰

代塚堰 清水墓堰 沈墓堰 東裴塔堰 西裴塔

堰 立沈堰 馬塚堰 楊瀆堰 東閘堰 墓塚堰

右隸齊景鄉以上至元志 案浙江通志齊景鄉內又有曹婆堰王道堰紀家堰方家堰

堰陳家堰瓦石堰金賣線堰周家堰俞家潭堰

西閘堰 祇園堰 俞家堰 大芒塘堰 麥塔堰 西

黃泥堰 朱洞堰 楊蕩堰 余家堰 夏角堰 姚

嘉興府志

卷二十九 水利

畚

星堰 翁莊堰 沈福莊堰 志公堰 大孫堰 右

隸華亭鄉至元志 案浙江通志華亭鄉內又有顧施東柵堰顧施北柵堰新帶堰方塘堰羅漢堰

戴堰 馮奧堰 錢家堰 許洞堰 月河堰別見後 右

隸大易鄉至元志 案浙江通志大易鄉內又有沈馳堰馮河堰

十八里堰 案括異志武原有十八都分上下村上村在

此堰下

月湖堰 案宋史河渠志云當湖自月湖浦入海考月湖

在邑南境何以不北流而反趨于南且當時海口又烏

能使鹹潮不入內地無損禾稼乎是不可解

橫橋堰 乾隆乙巳大旱賴導橫橋堰迤北水輸灌各鄉



歲得稔以上平湖王志

石門縣

包角堰 在縣南一里久廢知縣蔡貴易復之陳方伯善

為記 陳善記役有妨于民者其利一其害一即舊迹所

綿邈若舊所無焉自我創建可也矧害不及毛髮而利

垂百世上不糜公帑下不竭民財脩復故壤以弭隱憂

是役可已乎君子持議如握璧與役如救焚造發力舉

不能旦夕謂害一利百者耳議定而役竣而紀功即一

堰之細可述已語見縣與海昌接壤海昌地斥鹵故多

鹽盜剽掠四出患首及石宋時以邑城之南有支河可

達海上遂築堰塞河以遏盜衝堰名包角今縣志可考

也及元兵入浙決堰直薄城下石燬于兵而堰決不復

者迄今垂三百年嘉靖乙卯島夷內訌突至浙西咸被

其禍而石邑大酷總督大司馬新安胡公相視地形于

故堰建敵臺二以相守望屹然全湯則是堰不特為石

邑外護誠一扼塞也邇年海上雖幸無事而亂僅存秦

嘉興府志

卷二十九

水利

巽

鹽盜競起石迫巖鄉士民患苦之癸酉秋浚河通漕築  
隄障水堤當堰址士民望見喜曰此天相我也益務增  
築用圖恢復屬隣邑人有稱運道不便者陰阻成議然  
運道向由章婆堰橋出西安邱高橋至官塘初不由此  
特假此以伸其私耳于是闔邑士民謀自捐貲別濬新  
河亦可通漕仍伐石建聚秀橋以便水陸經行者議已  
定乃請于督撫謝公暨守巡諸公咸報曰以一堰而可  
以弭全邑寇患亦何愛而不為其如議事下有司隣邑  
人百計賊之郡大夫李公邑大夫蔡侯皆精練政理有  
幹局堅守成議不為動既而守巡諸公以事過石邑親  
歷其地環視久之歎曰是固當塞彼紛紛之說何為者  
自今役宜速舉敢異議者坐之已仍檄有司更高廣何  
家橋雖巨艘亦可直達無礙石民感悅上德力畚築不  
踰時迄工始事于萬歷二年十月竣于三年正月役成  
鄉大夫運長郭君輩來徵予言記其事予惟包角一堰  
耳據得形便能為輕重若是即建堡立障可知已顧其  
議久不決非三四鉅公獨斷于上李公蔡侯協贊于下  
石民奚享千百年之利哉夫堰以障水眾說之侵公議  
猶水之侵堰也能持碩畫以敵羣喙即于何可立就詩  
所謂衆心成城是已奚獨一堰哉乃斯堰非上德弗成



子故樂  
為記之

羔羊堰 在縣北九里

石門堰 在縣北十八里以上崇德新志

桐鄉縣

車口堰 永新堰 俱在運河塘右浙江通志

妙智堰 莫家堰 羅家堰 洪家堰 高家堰 曹家

堰 姜家壩 桐鄉徐志載有妙智堰橋港莫家堰橋港羅家堰橋港洪家堰橋港高家堰橋港曹

家堰橋港姜家壩港改堰為橋年分無考以名尚存故備載之新纂

浙江通志桐鄉之水利與秀水石門相等惟賴運河之水流入以引灌田畝清風永新保寧等鄉其患在澇宜高築圩岸以防浸溢梧桐慕化千金等鄉其患在曠宜時疏浜涇以資車戽四境之內水皆平行故無賴於堰

嘉興府志

卷二十九

水利

堰

壩所當急者惟濬河築塘而已